

Huet

I.

Bien cuidai toute ma vie
Joie et chançons oblir;
Mais la contesse de Brie,
Cui comant je n'os veer,
M'a comandé a chanter;
Si est bien droit que je die,
Quant li plest a comander.

II.

Je di que c'est grans folie
D'essaier ne d'esprover
Ne sa moillier ne s'amie
Tant com on la vuet amer;
Ainz se doit on bien garder
D'enquerre par jalousie
Ce qu'on n'i vodroit trover.

III.

Cornent que je chant ne rie,
Je deüsse mieus plorer,
Quant la mieudre m'est faillie;
Car, quant je vueil mieus parler
Et a li merci crier,
Lors me dist par contralie:
«Quant irez vos outre mer?»

IV.

Se ele est d'amors esprise,
Malement li a membre
Coment j'ai a sa devise
Sens nul contredit esté;
Mais, espoir, ce m'a grevé,
Com ne cognoist bel servise
Tant c'on ait autre esprové.

V.

Aillors a s'entente mise,
Si m'a laissié esgaré;
Mes ja sa fiere cointise
Ne vaincra ma loiauté.
Ja tant ne m'avra fausé,
Que s'ele iert de cent reprise,

Si la prenroie je a gré.

VI.

Bien deüsse avoir conquise
S'amor a ma volenté,
Por ce que j'ai sens faintise
Toz jors loiaument amé.
Or ne m'ait pas en vilté
Por la fièvre qui m'a prise,
Que j'en guerrai en esté.

- letto 518 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/huet-8>